

■ CONVIVENZA

Avert per nov?

DA BETTINA CADOTSCH*

Tschel di hai jau guardà puspè ina giada il film «Grease» da l'onn 1978. La romanza tranter il «bad boy» Danny Zuko (John Travolta) e l'innocenta Sandy Olsson (Olivia Newton-John) m'ha gia da matta intgantà enorm, uschia che jau hai gia vis fitg bleras giadas quest film. Era sche jau enconusch mintga scena ordadora hai jau guardà plain tensiun e ris davart las medemas scenas sco gia bleras giadas avant. Cura ch'il film è stà a fin ma sun jau gia legrada d'al guardar ina proxima giada.

Il film da cult «Grease» è atgnamain mo in exempel da blers. Jau guard fitg savens films ch'jau hai vis gia varsaquantas giadas e che m'han plaschi bain. Jau poss perfin anc ir in pass pli lunsch: l'exempel dals films vala era per numerusas autras activitads e chaussas. Saja quai per products, mangiativas, vestgadira ed insaco per mia entira vita. Jau sun propi en blers grads in carstgaun da disa.

Jau ma trapel per exempel adina puspè ch'jau mangel adina il medem en in restaurant ch'jau enconusch bain. Jau guard bain tras la carta, studegel ed avess era gust da fitg blers differents menus, la finala empost jau però tuttina



quai ch'jau hai gia gè diesch giadas. Savens ina buna pizza cun salami.

Tuttina vesi ora tar la vestgadira. Jau hai ina tarmenta stgaffa cun ina pluna vestgadira e tuttina port jau adina il medem. Quai vul dir ina pitschna part da mias bleras differents jeans ed ina pitschna part da mes t-shirts. Savens èsi per finir insatge nair. Cumprar cumprel jau tuttina adina puspè novas chaussas, tge ch'è trist e tgutg.

Jau sai che quai èn uss en sasez trais exempels irrelevant. Ma quai èn trais exempels che mettain er auters pudessan dir da sa-sezs. Forsa cun differents chaussas, però cun il fatg ch'ins tscherna savens l'enconuschent, quai ch'ins sa ch'i vesa ora bain e quai ch'ins ha la garanzia ch'i cuntenta ins. La dumonda è ussa schebain quest cumportament è bun u nausch.

Forsa ch'igl è bun, cunquai ch'i mussa atgnamain ch'ins ha gia chattà insatge che plascha. Ditg cun auters pleds signiftga quai era che nus na duvrasan betg adina insatge nov u sappia Dieus quantas alternativs en nossa vita. U betg?

Auters schessan ussa forsà ch'ins n'è betg avert per insatge nov. I constat mettain ch'il curaschi manca tranteren. Ma blers sa dumondan eventualmain era: Pertge empruvar insatge nov e lura n'èsi gnanc bun? Pertge ristgar insatge sch'ins è cuntent?

Cler, guardar films e tscherner il da mangiar è sco gia menziunà atgnamain insatge irrelevant. Ma sch'ins guarda sin l'entira vita, lura fai forsà senn da sa far patratgs davart las atgnas disas. Jau schess ch'i saja bun dad avoir quellas per crear constantas en la vita. Jau schess però era ch'i fiss qua e là bun da ristgar insatge nov e dad ir autras vias che quella ch'ins va adina. Quai vegn ad esser in bun mix per schlargiar l'agenorizont. E quai betg mo en il mund culinaric.

* Bettina Cadotsch è creschida si a Savognin. Ella studegia Multimedia Production a la Scola auta da tecnica e d'economia a Cuira e lavura tar Radio Südostschweiz.